

**ACTIONEM DE DOLO
MALO MALITIARUM
ROMAE
EVERRICULUM
SUPELLECTILEM...**





ILLVSTRISSIMIS ATQVE EXCELLENTISSIMIS

DOMINIS

AVGVSTISSIMI ATQVE POTENTISSIMI

MAGNAE BRITANNIAE REGIS

DVCIS ELECTORIS BRVNSVIGO-
LVNEBVRGICI

MINISTRIS STATVS

ET

CONSILIARIIS INTIMIS

MECAENATIBVS MAXIMIS

STATORIBVS ERVDITIONIS SYMMIS

DOMINIS SVIS

GRATIOSISSIMIS.

H A N C

DISSERTATIONEM INAUGURALEM

P R O

TANTORVM PATRONORVM

FELICITATE PERPETVA

VOTA NVNCVPANS ARDENTISSIMA

HVMILLIME OFFERT

ILLVSTRISSIMORVM NOMINVM

CVLTOR OBSEQUIOSISSIMVS

BVRCHARDVS CHRISTIANVS BEHR.

P R O O E M I V M.

Quando apud animum meum constitui,
 exeuntibus studiorum Academicorum
 annis,

quid valeant humeri, quid ferre recusent,

explorare, & mihi, si mererer, summos in arte, cui hactenus omni studio incubui, honores conferri, petii, simul, ut fas est, ad ea quae a Iuris utriusque Candidato fieri praestarique oportet, me obstrinxi, ad meas nunc etiam partes pertinet conscripta Dissertatione cathedram conscendere, & ad superiora ascensum strenua nonnullarum thesium tuitione mihi parare. Ea fini animum ad scribendum appuli, ea ratione nata est haec opella; quam eo facilius apud aequos rerum aestimatores excusatum iri confido, quod non vana aliqua laudis cupido, & viribus maior fiducia eam in publicam lucem protruserit, sed officii ratio & laudatissimae ILLVSTRIS IVRE-CONSULTORVM ORDINIS Leges eandem mihi imperauerint. Nullus dubito, fore, ut in hoc instituto alii accuratam interioris iurisprudentiae

A

dentiae cognitionem, alii scribendi vim & acumen sint desideraturi: me non inuito, qui nunquam me ipse ita amaui, vt singularem vel ingenii laudem, vel doctrinae praestantiam mihi tribuerim. Idem tamen & illa priora sibi iterum iterumque dicta putent, & quod imminens necessarium & vrgens iter effecerit, vt mihi haec ipsa, alterum veluti pedem in vestigio habenti, conscribenda fuerint. Ceterum semper existimaui, ingenui hominis & in praeclara studia incumbentis officium esse, vt summa prospiciat, non leue ad progrediendum in semita aliquando difficili incitamentum, ad quae ipsa si peruenire non datur, in mediis tamen ~~idem subsistet, ad quae ipsa~~ loca non peruenisset, nisi improbum laborem illa summa & pulcherrima suasissent, & ab imis radicibus, in quibus haerere fuisset turpe & indecorum, discedere persuasissent. Quod autem ex omni, eoque amplissimo Iuris penu hanc *de Dolo malo* materiam selegerim, consilio factum est **ILLVSTRIS DECANI** mei, cuius me adeo non poenituit, vt existimem, ea, quae meditatus sum, cum fructu, non equidem ab iis, qui ad penetralia artis peruenerunt, a commilitonibus tamen, & meae aetatis hominibus legi, & quae olim Digestorum profundum peragrans audierunt, ita commodè repeti posse. Duo inprimis

mis sunt, quae in hac tractatione me insigni voluptate affecerunt: primum illa mira, &, nisi arcana dominationis illud imperassent, misera Quiritium diligentia, a jure stricto ad aequitatem per ambages redeundi: deinde, quod hoc ipsum Iuris Romani & Ediſti Praetorii caput luculentissimum exemplum praebeat doctrinae a fidissimo Praeceptore, quem paulo ante laudaui, saepe numero inculcatae, eiusdemque verissimae: non modo ea Romanorum instituta, quae aduersis frontibus cum nostrae reipublicae statu & moribus pugnant, sed & inter illa, quae prima fronte summa aequitatis specie se commendant, multa a foro nostro, & iuris nostri ratione reapse esse aliena. Quid, quaeso, nos Germanos, quotquot moribus antiquis viuimus, magis decet quam fides? Quid nostro candori magis aduersum, quam dolus, isque malus? Et quid adeo magis nostrae Iurisprudentiae amicum esse potest, quam de dolo actio? quid foro nostro accommodatius, quam illud iudicium, quod eloquentissimus TVLLIVS in Libro III. de Natura Deorum c. 30. EVERRICVLVM MALITIA-RVM OMNIVM, & iure quidem, appellat. Et tamen haec omnia aliter se habere, ni fallor, clarissime ex infra dicendis eluceſcet. In hunc autem modum argumentum pertractare lubuit, vt

prius non nulla *de Naturae & Gentium Iure*, & quae sit doli secundum illud vis atque effectus, dicam; deinde *Iuris Romani placita*, qua licebit, euidencia exponam, qua in re Clarissimo ICto Belgae GERHARDO NOODTIO in suo *de forma emendandi doli mali in contrahendis negotiis admissi* Libro, inter Opera Tom. I. p. 351. reperiundo, me post alios plurimum debere, lubens & ingenue profiteor; denique *de illius formae emendandi doli mali apud nos usu*, vel potius *non usu*, quae videbuntur, subiiciam, quod vt Deo propitio fiat, Numen eius pia mente prius veneror.



CAPVT

C A P V T I.
 DE DOLO MALO
 SECVNDVM DICTAMEN RECTAE
 RATIONIS.

I. HOMINVM MAGNA EST ALIQUA
 SOCIETAS.

Inter nos omnes, qui vno communi nomine homines appellamur, *pr. J. de Libertinis*, non modo cognationem quandam naturam constituisse, ex quo ICto FLORENTINO in *l. 3. D. de J. & J.* consequens est, hominem homini insidiari nefas esse, ita vt eius modi scelus speciem parricidii prae se ferat, verum etiam iisdem omnibus vnam esse societatem longe maximam atque veluti ciuitatem quandam, neminem fugere potest, qui nouit naturali lege nos omnes contineri, quae, etiam si mansisset vna, nec hominum, nec gentium, ciuitatiumque particularium differentiis introductis, Dei imperio vnumquemque subesse docuisset.

II. FIDE COPVLATA.

Omne autem, quod sociatum est, vinculo
 A 3 aliquo.

aliquo colligari, necesse est; quod in hac humani generis societate est *fides*, illa in promissis seruandis constantia, qua motus vnusquisque, qui vel voce homini diuinitus data, vel scriptura, admirando inuento, vel denique alio quocunque consensus signo interposito, aliquid se facturum recepit, reapse se fecisse, vti est consensus, ostendit. *Fides* illa non modo *sanctissimum humani pectoris bonum est*, quam si quis teneat, nulla necessitate ad fallendum cogitur, nullo corrumpitur praemio, teste SENECA *Epistola LXXXVIII.* verum etiam si CICERONEM *de Officiis II. 24.* audias, nulla res vehementius continet rem publicam, quod non minus in maiori illa gentium societate verissimum esse, probe obseruat HVGO GROTIUS in aeterno opere *de Iure Belli & Pacis L. III. c. 25.* adde si lubet *Librum II. c. II.* vbi FRANCISCVM CONNANVM amore iuris Romani, vt videtur, non nihil tricantem refellit, & egregium illud VLPiani effatum in *l. i. D. de Pactis*: *Quidenim tam congruum fidei humanae, quam ea quae inter eos placuerunt seruare*, vrget.

III. QVOD TAMEN VINCVLVM SAEPE RVMPITVR.

Fidem humanam appellat ICtus & recte:
ita

ita illa virtus homini propria est, vt non magis hominem esse credam, qui absque fide est, quam qui absque vita. De homine loquor, qui rectae rationis vsum tenet, & immota mentis constantia a legitimo tramite se ne latum quidem vnguem abripi patitur, quorum tamen magnam aliquando esse penuriam, vel illa Diogenis, homines in medio die lumine accenso quaerentis, cauillatio ostendit. Nempe sunt in nobis hostes tres interni longe validissimi, ambitio, voluptas, auaritia, aeternum cum omni virtute & illo congenito recti amore & tantum non internecinum gerentes bellum, quae, fallere fidem, licet grauissimum sit, suadent & saepe numero persuadent. Neque tamen illis, qui fidem frangunt, vna placet methodus, sunt, qui vi aperta nituntur, sunt, qui clandestino dolo vtuntur.

IV. VEL APERTA VI.

Quod ad illos attinet, in ciuitatibus ob vim iustam, quae imminet, pauciores habentur; inter ipsos gentium rectores plures sibi dictum crediderunt illud pessimum: Jus, si violandum est, regni gratia violandum est. (a) De his rectissime CICERO Hugoni Grotio loco supra allegato excitatus: *Fide sublata feris sunt similes, quorum vim omnes exhorrent*, cui sententiae IDEM in

(a) Vid. CICERO Offic. III.

in Annotatis Legatorum nostri IUSTINIANI ad Chosroën Persarum Tyrannum vocem verissimam subiungit: *Nisi ad te praesentem, Rex, haec haberetur oratio, nunquam putassemus, Chosroen, Cabadae filium, cum armis intraturum in fines Romanos, contemnis iuramentis iuratis, quod inter homines summum firmissimumque creditur veritatis & fidei pignus, ruptis praeterea foederibus, quae sola spes relinquuntur iis, qui ob belli mala non in tuto viuunt: Quid enim hoc aliud esse dicamus, quam hominum vitam in ferarum vitam mutare. Nam sublatis foederibus sequitur, ut omnes inter se aeternam gerant bella. Bella autem sine fine hanc vim habent, ut homines perpetuo teneant naturae suae extorres. Adiiciam locum in CICERONE de officiis L. III. c. 5. obseruatum: Detrahere igitur aliquid alteri, & hominem hominis incommodo suum augere commodum, magis est contra naturam, quam mors, quam paupertas, quam dolor, quam cetera, quae possunt aut corpori accidere, aut rebus externis. Nam principio tollit conuictum humanum & societatem. Si enim sic erimus affecti, ut propter suum quisque emolumentum spoliaret aut violet alterum, disrumpi necesse est eam,*
quae

quae maxime est secundum naturam humani generis, societatem. Quale autem aduersus eiusmodi hominem in statu naturali vel gentem remedium? Non aliud, quam quod aduersus feras nociuas. Venatum eunt plures, iisdem iniuriis lacerati, vt feroci belluae pares sint, hoc est, pio iustoque bello fidem fractam vlciscuntur, capiunt feram, &, quod nihil tutum amplius sit, occidunt, aut tam miseram efficiunt, vt, voluntate nocendi forte superflite, facultas desit.

V. VEL FRAUDE ET DOLO.

Alterum genus eorum, qui fidem fallunt, sunt, qui, quod aliquo pudore turpissimi facinoris ducantur, verenturque, recta ratione non prorsus deiecta, ista naturalia vincula societati humanae tam necessaria ense veluti recidere, aut quod in ciuitate vim iustam, in statu naturali bellum metuant, id quod promiserunt, quod alter futurum sperat, quod bona fides, vt fiat, vult & imperat, non faciunt, attamen pacto conuenito fecisse satis, interea videri volunt, & vel verborum, quibus, ab initio mali, vsi sunt, ambiguitate, ad paciscendum accedentes, vt **PLAVTINIS** vocibus vtat: (b)

B

com-

(b) *In Amphitruone Act. I. Sc. I. v. 210, 211.*

compositis mendaciis, consutis dolis

aggrediuntur, vel verborum, quibus absque dolo vsi sunt, vbi postea fallendi mentem inuadit cupido, malitiosa & saepe friuola interpretatione, se nihil nequiter & contra fidem facere, aliis ipsique laeso persuadere conantur. Ex quibus hominum generibus, num illud violentum & audax, an hoc subdolum & vafum, maiorem vituperationem mereatur, dubium videtur. Parum abest, quin illos hostes equidem generis humani habeam, sed quibus occurri, & ita vis vi coerceri aut repelli potest, hos autem sicarios & percussores, qui hominis incauti & aperti latus hauriunt. Sed eo minus immorandum est huic quaestioni, quod viro bono ab utroque vitio abstinendum sit. Satius est indagare, quae talis pacti conuenti, quod alterius dolo laborat, sit validitas.

VI. QVO CASU, QVICQVID A LAESO PACTVM,
QVICQVID CONVENTVM, EST NVLLVM.

Vir de Iurisprudencia, & maxime quoque naturali immortaliter meritus, NICOLAUS HIERONYMVS GVNDLINGIVS *Juris Naturae & Gentium c. IV. §. 40.* praeclare: *de Dolo*, inquit, *paene idem tenendum*, (nempe quod non noccat)

nam

nam cum dolus sit certo sensu error, aliorum intuitu malitia insignis, hinc nulla imputatio ex parte facientis ac contrahentis oriri potest, tum quia errans minime promittit, tum etiam quia malitiose decipiens iure acceptandi destituitur. Praeclare, inquam, nisi quod hoc vnum sit monendum, dolum ipsum nunquam esse errorem, neque enim dolum committens errat, scit, quid decepturus alterum agat; deceptus errat, sed in eo nullus est dolus, nulla malitia: dolus tamen decipientis in decepto necessario errorem parit, & hic illè sensus est, quo Virò magno dolum, errorem appellare placuit. Iam verissimum est facienti ac contrahenti cum homine dolofo nihil posse imputari. Omnis pactorum validitas a voluntatum vnitione pendet, quae si absit, concidit pactum, nec vnquam ad maturitatem aut perfectionem peruenit. Dolofo vsitur verbis falsis, aut ambiguis, nouit se mentiri, nouit duplicem sensum alterum ignorare, nouit alterum idem promittere, quod pactum illud sibi proficuum sit futurum, si, quae ipse ait, sint vera, si eo sensu, quo ipse verba capit, & quem vnum esse credit, accipiantur; nouit denique non promissurum, non facturum alterum, si error eximatur, si mendacium detegatur, si de genuino sensu edoceatur, si intelligat,

alio verborum sensu se priuandum sperato comodo, se laesum iri: & nihilominus vnitas esse istas duas voluntates, alterius ludentis & laedentis, alterius pro emolumento cupito in certissimum damnum, in incommoda, in contumeliam coniiciendi,

credat Iudaens Apella.

Iam siingas, verba fuisse prorsus ambigua, nec a dolofo suggesta, praeuisum tamen esse, fore vt alter decipiatur, licet hic, qui decipit, velit vrgeri, non se sed alterum clarius debuisse loqui: bona fides tamen non patiebatur, vt in haec anticipitia alterum deduceret, monendus erat paciscens de ambiguo sensu, & in quam sententiam ab vtroque contrahendum foret, accurate constituendum. Secus faciens, vt & ille, qui bene & serio dicta sui quaestus causa in malignum sensum torquet, certe in illud summum Iuris naturalis praeceptum: *Neminem laedere*, impingit. Si itaque deinde ita laesus se dixisse, quae noluit, se fecisse, quae non facta vellet, conqueritur, audiendus est, & si mitissime respublica cum Sycophanta agere vult, dicta esse non dicta, facta pro non factis esse habenda, omnia in pristinum statum esse reducenda, sua auctoritate definit.

CAPVT

CAPVT II.

DE DOLO MALO

SECVNDVM LEGES ROMANORVM.

I. FIDEI ET DOLI VOCES VNDE DESCENDANT?

A Iuris Naturalis placitis, ad ea, quae Iure Romano statuta sunt progredior, cuius Consulti, cum de verbis etiam solliciti esse soleant, *arg. l. i. pr. D. de J. & J.* exemplum sequar, & de *Fide* & *Dolo* nonnulla afferam. Placet omnino *Fidei* ἔτυμον, aut vere inuentum, aut ingeniose quaesitum, a CICERONE *Libro I. de Officiis c. VII.* *Quanquam hoc videbitur fortasse cuiusdam durius, tamen audeamus imitare Stoicos, qui studiose exquirunt, unde verba ducta sint: credamusque, quia fiat, quod dictum est, appellatam fidem:* de quo etiam ad Tironem suum *Epist. famil. XVI. 10.* gloriatur: *Nostra ad diem dictum fient. Docui enim te: fides* ἔτυμον *quod haberet. Dolum, nec a dolando, nec a deludendo, nec a dolendo deriuauerim. v. VOSSIUS in Etymologico Latino, hac voce. Graecum enim vocabulum est δόλος, quod num* vt EVSTATHIVS vult, a Graeca antiqua voce

δῖλω descendat, viderint ii, qui istam linguam me rectius callent.

II. QUID SIT FIDES? QUID SIT DOLVS?

A verbis ad rem, definitionemque proxima est via: vbi iterum, quod ad *Fidem* attinet, cum CICERONE sentio, qui loco ex *libro de officiis* paulo ante allegato: *fides*, inquit, *est dictorum conuentorumque constantia & veritas*, vere, vt opinor. *Dicta* sunt promissa; *Conuenta* etiam negocia mutuae promissionis comprehendunt; eorum primum requisitum est *veritas*, quae & mendacium & ambiguitatem excludit, alterum *constantia*, quae eius, quod fieri debet, executionem continet, & cauillari captaeque verba vetat. De dolo est luculentus locus VLPIANI in l. i. §. 2. D. h. *Dolum malum Seruius quidem ita definit, machinationem quandam alterius decipiendi causa, cum aliud simulatur & aliud agitur. Labeo autem posse & sine simulatione id agi, ut quis circumueniatur: posse & sine dolo malo aliud agi, aliud simulari: sicuti faciunt, qui per eiusmodi dissimulationem deseruiunt & tuentur vel sua vel aliena. Itaque ipse sic definit, dolum malum esse omnem calliditatem, fallaciam, machinationem, ad circumueniendum, fallen-*

lendum, decipiendum alterum adhibitam. Labeonis definitio vera est. Ipsemet, vtramque veram esse, vtramque defendi, vtramque Iuris studiosis sufficere posse, iudico, per ea quae Ill. GEBAVERVS in Dissertatione de Iustitia & Jure nuper a me defensa §. 2. tradidit.

III. DISTINCTIO IN DOLVM BONVM ET MALVM.

Proximum est, vt inspiciamus, cur ICti *Dolum malum* dicant, cum omnis dolus siue caliditas sua natura mala esse videatur. Nempe doli vocabulum ad eorum genus pertinet, quae mediae naturae dicuntur, & nunc in bonam, nunc in malam partem accipi possunt. Cum etiam datur dolus bonus, ICti dolum, quem coërcere volebant, merito appellabant malum. Ita doli aduersus hostem vsurpati, quod in hunc omnia liceant, & natura & effectu boni iudicantur. Apud VIRGILIUM, vt probe monet HVGROTIUS de *Jure Bell. & Pac. L. III. c. i. §. 6.* dictum illud

- *dolus an virtus, quis in hoste requirat?*

sequitur ipse

- *Ripheus iustissimus vnus*

Qui

Qui fuit in Teucris & seruantiffimus aequi.

Sed & in ciuili statu, si falsa dico alterius laedendi causa, mendacium est & dolus malus, si falsa dico, vt LABEO monebat, deseruendi causa & tuendi vel mea vel aliena, est dolus, sed bonus. Reticentia veri licita, qua aliquando caedibus, & aliis magnis malis obuiam ire possumus est dolus bonus; silentium iure vetitum, vt in nostro titulo, si fileam, quae nosse alterius interest, vt nempe ille laedatur, est dolus malus. Vide de dolo bono, si lubet OSWALDI HILLIGERI *Donellum enucleatum* P. I. Lib. XV. c. 40. lit. C. vbi & D. Pauli Apostoli vocem non negligit ad *Cornithios* II. c. 12. v. 16. perscriptam: Ὑπάρχον παῦρος, δόλω ὑμᾶς ἔλαβον, *cum essem astutus, dolo vos cepi*, gratuita nempe verbi diuini praedicatione.

IV. DISTINCTIO IN PACTA ET CONTRACTVS.

Distinguere coepi, pergam hac semita, quod alia via ad penitiorem Actionis de Dolo malo naturam peruenire vix liceat. Itaque ante omnia Pacta a Contractibus separanda sunt. Iure equidem naturali non est inter Conuentiones differentia, omnium pactiorum vna est natura, quae in illa legali definitione VLPIANO memorata continetur:

tinetur: *Est duorum pluriumue in idem placitum consensus. l. i. §. 2. D. de Pactis.* In hac simplicitate Iuris naturalis non subsistere Quirites; quantuius momenti visa est iisdem exceptio ciuium incautis promissis constrictorum: se non satis deliberasse; huic optime occurri posse existimarunt, si praecipuis negociis iure ciuili nouam darent formam, ab illis, qui alterum valide obligare vellent cum cura obseruandam; conuentionibus secundum iuris ciuilis praescriptum initis permitterent actionem in foro, reliquis negarent: illas a contractiore paciscentesque valide constringente natura contractus appellarunt, his pactionum vel pactorum nomen apangendo & compingendo ductum reliquerunt. Neque enim quisquam sibi persuadeat, Iura Romana pactorum fidem sustulisse, minime vero; nam & ad excipiendum in ipso foro Romano valebant; negligentibus saltem iuris ciuilis remedia, & fidem alterius naturali ratione sequentibus, demto iuris ciuilis auxilio, non aliud praesidium, quam illud, quod elegerunt ipsi, naturalem pudorem reliquerunt.

V. DISTINCTIO INTER PRAETOREM ROMANVM ET IUDICEM PEDANEVM.

Contractum erat, alter alteri sponte sua non satisfac-

C

facie-

faciebat, actione opus erat, & in foro res tractanda. Initium fiebat ab in ius vocatione, qua actor reum ad Praetorem vocabat, in eum nempe locum, ubi ille salva maiestate imperii & more maiorum ius dicebat *l. pen. D. de Iustit. & Iure*. In iure Praetor id maxime inspiciebat, num de Iure aliqua exortitura sit disceptatio, aut iure deficiente ex aequo & bono litigium finiendum, an vero tota causa a facto & eo, quod inter litigaturos actum erat, penderet. Isto casu Magistratus Populi Romani ipse iudicabat, vel cum Decemviris, vel inter Centumviros, hoc deprehenso, Iudicem dabat, qui Pedaneus dicebatur, quae est adeo nova ad rem nostram ~~pertinens~~ distinctio. Scilicet Praetor initio sui magistratus iudices, quos agendis iudiciis idoneos credebatur, seligebat, & in decurias albumque referebat, qui, quod non ex alto & e Tribunali, sed de plano & veluti pedibus iudicarent, ad differentiam iudicum maiorum pedanei dicebantur. Quoties itaque quaestio erat facti, v. c. num Titius a Maeuio acceperit centum mutuo, num eosdem centum rursus Maeuio soluerit &c. dabat talem iudicem, & quidem quem partes volebant, dabat etiam iudicandi formulam, ut ille sciret, quibus notio sua limitibus circumscriberetur. Haec pro diuersa contractuum, ex quibus actio nata erat, natura erat vel angusta

gusta vel lata, vel stricti iuris vel bonae fidei. Vide haec vberius tradentem NOODTIVM *de Jurisdictione & Imperio* L. I. c. 8. & 13.

VI. DISTINCTIO IN CONTRACTVS BONAE FIDEI ET STRICTI IVRIS.

Noua itaque formulae, & actionum, ipsorumque contractuum in bonae fidei & stricti iuris negotia distinctio, quorum si nosse cupis catalogum, adeas §. 28. & *sequ. I. de Actionibus*. Quaecunque negotia ibi memorata offendes, bonae fidei, reliqua sunt stricti iuris. Sed cognoscere penitus, quae fuerit vtriusque conuentionis & iudicii natura, hoc opus, hic labor est, quo cum omnium felicissime sit defunctus B. GYNDLINGIVS in doctissima dissertatione *de Vsu practico Actionum bonae fidei & stricti iuris Halae* 1724. 4. edita, eius vestigia legere erit meum. Primo notes bonam fidem hic non opponi dolo malo, sed ei, quod cum in interpretando tum in iudicando strictum & durum dici potest: vnde falluntur illi, qui, habere nos negotia & iudicia malae fidei plena, legibus nostris approbata, temere crediderunt: Quoties itaque Iudici dabatur formula *bonae fidei*, hanc sequebatur, &, licet maxime eidem sententiam laturo ab eo, quod ab initio conuentum erat, esset abeundum, libera tamen pote-

stas erat, ex bono & aequo aestimandi, quid quantumue actori dari, restitui debeat. §. 30. *J. de Action.* Tunc *aequius* iudicaturus, *melius* iudicaturus erat, quod ipsi contrahentes praesumerentur ab initio ita egisse, vel agi voluisse, *vti inter bonos bene agier oportet.* Quoties autem *stricto iure* iudicare iussus erat, omni aequitate neglecta, sequebatur, quod dictum, quod scriptum, quod conuentum ab initio statim: quo & pertinebat, si cautus homo, *dolum malum absfuturum esse*, erat stipulatus. Valde verisimile est, antiquissimis temporibus omnes contractus fuisse stricti iuris, quod rigidum illud strictumque ius, rigidis illius temporis Quiritium moribus maxime conuenire videretur, simul iuris illius autores plebi incautae persuaderent, ita neglecto iudicum arbitrio minus incertum fore ius, ita certo certius futuram, vt a iudicum voluntate non pendeant ciuium fortunae omnes, &, quicquid singulis ex neglecta aequitate accederet damni, istud communi omnium securitate pensari. Sed laxatis illis rigidis moribus, expulsa paupertate, inuentis opibus, conuentionibus contractibusque omnis generis in immensum multiplicatis, non patiebatur amplius vitae societatis, & ciuilis compagis ratio, vt spreta aequitate in plerisque iudicaretur. Visum Praetoribus in plurimis

mis contractibus bonam fidem admittere, & pedaneis iudicibus, vt eam omni modo in iudicando sequerentur, iniungere, paucis negotiorum figuris in veteri specie relictis, inter quos verborum obligatio, literarum obligatio, & mutuum emi-
nuerunt.

**VII. QVAE SECVNDVM IVRA ROMANA DOLI
MALI VIS IN CONTRACTIBVS BONAE FI-
DEI, ET QVOMODO ILLE EMENDA-
TVS FVERIT.**

His ita praeſtructis nunc videamus, quid in vtroque contractuum genere circa dolum malum fuerit iuris, cum ante Galli Aquilii formulam inuentam, tum poſt eam. Et quidem quod ad contractus bonae fidei attinet, ſtatim ab initio huius qualitatis introductae dolo commiſſus ab ipſo iudice ex formula laxa omnimodo erat emendandus. *Nihil enim conſenſui tam contrarium eſt, qui & bonae fidei iudicia ſuſtinet, quam,* non modo *vis & metus*, vt ait l. 116. pr. D. de R. J. ſed etiam dolo, quod non minus ex eiſdem legis §. 2. apparet, vbi habetur: *Non videntur, qui errant, conſentire.* Dolo autem oblato, deceptum errare ſupra vidimus. Si itaque quis dolo deluſus promiſerat aliquid, ab aſtore conuentus exceptione nullitatis vtebatur, & a Iudice

pedaneo formulae laxioris beneficio absoluebatur. Sin deceptus id quod suum erat praestiterat, dolo patefacto, laesione comperta, in eius manu erat positum, num querela nullitatis vellet vti, & petere, vt auxilio boni viri omnia ad pristinum statum reducantur, an malit actione ex contractu niti, & flagitare a iudice, vt ex bona fide dolus ille emendetur, hoc est, contractu perdurante laesio praestatione eius, quod rei intererat, ab actore corrigatur.

VIII. DISTINCTIO IN DOLO MALUM CAUSAM DANTEM CONTRACTUI ET INCIDENTEM.

Plerique Interpretes hic distinguunt inter dolum malum, qui contractui causam det, & eum qui in contractum incidat: illum dicunt, cum quis ultro non contracturus, ad contrahendum dolo malo inducitur: hunc cum alias contracturus circa rem, aut circa aestimationem dolo malo circumscribitur: illic, aiunt, ipso iure nullum esse contractum, nec parere actionem, nec egere rescissione: hic contractum valere, sed laesionem actione bonae fidei vel exceptione doli mali emendari. Verius autem est, gratis inferri hanc distinctionem huic doctrinae; Auctores veteres & leges nostrae tacent: nulla commoda potest dari ratio, cur in contractum dolum plus liceat dolo causam danti,

danti, quam incidenti: difficile futurum est aliquando, distinguere ista duo dolorum genera: nihil solidi potest allegari, cur illa distinctio in bonae fidei iudiciis, quibus omnis dolus est aduersus, multum, in stricti iuris iudiciis nihil operetur: quae omnia eo plus ponderis habent, postquam constat *l. 7. pr. D. h.* illius distinctionis fontem vel glossificate laborare, vt probare nititur **NOODTIVS** in prooemio citatus *c. 14.* vel leui emendatione & commoda interpretatione, vt visum **GVNDLINGIO** *ad D. h. t. §. 7.* posse iuuari.

**IX. QVAE FVERIT DOLI MALI VIS IN
CONTRACTIBVS STRICTI IVRIS AN-
TE GALLVM AQVILIVM.**

Ad stricti iuris contractus discedo, & dolum iis immistum contemplor ante Galli Aquilii tempora, deprehendoque Iudicis pedanei nullum fuisse ob formulae rigorem aduersus eiusmodi deceptores auxilium, maxime si clausula: dolum malum esse abfuturum, non erat contractui adiecta. *Tunc Iudex*, sunt **B. GVNDLINGII** verba *§. 13. factum conuentionis solum circumspiciebat, angustisque terminis conclusus non tam perpendebat, quomodo sit actum, sed quid?* Ille nempe Iudex exceptionem doli mali negligebat, actionem doli mali emendatricem nesciebat, inuita aequitate,

te, bonis omnibus ringentibus, in fraude nempe magna, qualis illa, cuius historiam CICERONI in libro de Officiis III. c. 14. narranti debemus, & quam, cum mirum in modum haec nostra illustret, adscribam:

Caius Canius eques Romanus, homo nec infacetus & satis literatus, cum se Syracusas otiandi causa non negotiandi, ut ipse dicere solebat, contulisset, distitabat se hortulos velle emere, quo inuitare amicos & ubi se oblectare sine interpellatoribus posset: quod cum percubisset, Pythius ei quidam, qui argentariam faceret Syracusis, dixit: venales quidem se hortos non habere, sed licere uti Canio, si vellet, ut suis: & simul ad coenam hominem in hortos inuitauit in posterum diem. Cum ille promississet, tum Pythius, ut argentarius, qui esset apud omnes ordines graciosus, piscatores ad se vocauit, & ab his petiuit, ut ante suos hortulos postera die piscarentur: dixitque, quid eos facere vellet. Ad coenam tempore venit Canius: opipare paratum erat conuiuium: cymbarum ante oculos multitudo, pro se quisque, quod ceperat, afferebat:
ante

ante pedes Pythii pisces abiiciebantur. Tunc Canius: Quaesio, inquit, quid est, Pythi, tantumne piscium, tantumne cymbarum? Et ille, quid mirum? inquit, hoc loco est, Syracusis quicquid est piscium; hic aquatio: hac villa isli carere non possunt. Incensus Canius cupiditate, contendit a Pythio, ut venderet. Grauate ille primo. Quid multa? Impetrat, emit homo cupidus & locuples, tanti, quanti Pythius voluit, & emit instructos: nomina facit: negotium conficit. Inuitat Canius postera die familiares suos. Venit ipse mature. Scallum nullum videt. Quaerit ex proximo vicino, num feriae quaedam piscatorum essent, quod eos nullos videret. Nullae (quod sciam) inquit ille, sed hic piscari nulli solent. Itaque heri mirabar, quid accidisset. Stomachari Canius. Sed quid faceret? nondum enim Aquilius, collega & familiaris meus, protulerat de dolo malo formulas.

**X. ILLUSTRATIO E CANII A PYTHIO
DECEPTI EXEMPLO DEPROMTA.**

Hoc exemplo ut dicta illustrem, ante omnia
D do-

dolum hic non esse commissum bonum, sed malum, immo pessimum, palam est. Neque pactus est Pythius nequam cum Canio, Viro bono, sed contraxit. Maius dubium habet, qualis ille contractus fuerit, num bonae fidei, num stricti iuris? Qui obiter legit narrationem, emtionem venditionem habebit, qualem etiam initio celebratam esse constat ex verbis: *Canis dictabat, se hortulos aliquos velle emere, Pythius contra: venales se hortos non habere, quid multa? Canius impetrat, emit, & emit instructos.* Vide *Tit. Dig. de instructo, vel Instrumento legato*. Mox tamen addit CICERO: NOMINA FECIT, & hic est sceleris apex, quod bipedum nequissimus, ne praeda vlla ratione posset elabi, contractum bonae fidei, qualis emtio & venditio erat, in nomina, in literarum obligationem, in contractum stricti iuris commutavit. Vide *dissertationem de obligatione nominibus facta item literarum* in GUNDLINGIANIS P. XL. n. 2. Si emtio venditio mansisset, Canius Pythium, nondum soluta pecunia impudentem petito rem exceptione repulisset, solutam, redditus hortis, per querelam nullitatis repetiisset. Dubium videri poterat ex Interpretum sententia, num ille dolus causam dederit contractui, an inciderit; illud dici poterat,

terat, quod Canius ad Pythii hortulos emendos longa machinatione fuerit impulsus: hoc quod animus emendi hortulos ante fuerit, quam Pythius suos, vt non venales, licet maxime venales, oculis Pythii subiecisset, sed commodum illa distinctio iure non nititur, vt supra ostensum. Postquam Canius nominibus erat captus, ille quidem *stomachari*, sed *quid faceret?* *nondum enim Aquilius de dolo malo formulam protulerat.*

XI. REMEDIUM TANTAE NEQVITIAE A
GALLO AQVILIO REPERTVM ACTIO
DE DOLO MALO.

Pythiorum sine dubio plures crescentibus delictis inueniebantur, non Syracusis modo sed etiam Romae, immo vbique locorum, solet enim ferax esse illud lolium: indignabantur viri boni, & coërcendum esse id genus hominum fatebantur. Qua via ad tale remedium iri possit eos latebat. Erat admodum expedita, si Populus Romanus lege lata omne illud inter contractus bonae fidei & stricti iuris discrimen abiecisset, si ad iuris naturae simplicitatem esset reuersus, bonam fidem iudicibus in omni actione commendasset, satis ipsa experientia edoctus, postquam in praecipuis συναλλάγμασι idem dudum

D 2

pla-

placuisse, fortunas priuatorum ea ratione non periclitari. Sed quam difficile opus fuerit legislatio, ex antiquitatibus Romanis constat; Praetores dudum iuris noui, immo nouissimi con-
dendi auctoritatem suam fecerant, qua lubenter utebantur: Icti denique ius in manu sua relin-
qui haud inuiti videbant, quorum vnus GAL-
LVS AQUILIVS magnus formularum architectus
v. §. 2. *I. Quib. mod. toll. Obligat. & L. Gallus 29. D. de Liber. & post. hered. instit.*
inuenit verba solemnia, quibus, praeuia laesi per-
dolum, contra Iuris ciuilis rigorem stricte con-
cludentem, in integrum restitutione, de dolo
emendando agere liceret, magno dubio procul
populi excepta plausu. Antiquam formulam
hanc fuisse, hariolatur GVNDLINGIVS: AIO
TE OB ID, QVOD DOLO TVO MALO CAPTVS
FRAVDATVSQVE SVM, REM MIHI IVDICIS
ARBITRIO RESTITVERE DEBERE, AVT NISI
RESTITVAS, QVANTI MEA INTEREST CON-
DEMNARI. v. *Digestor. Part. 1. sive Prota h. t.*
§. 15.

CAPVT III.

DE FORMAE EMENDANDI DOLI MALI AQVILIANAE APVD NOS VSV.

I. VSVS FORMAE AQVILIANAE NVLLVS, LICET CVRA GERMANIS FIDEI SERVANDAE SIT SVMMA.

Tertio nunc loco considerandum venit, qualis sit illius formulae a Gallo Aquilio repertae in nostro foro vsus, de qua re vt initio statim mentem meam candide explicem, videtur ille in foro nostro esse nullus. Non dubito fore quosdam, quibus haec assertio videbitur paulo audacior, & qui indignabuntur, titulum Digestorum eximium remoueri a quotidiano vsu, actionem tanta aequitate subnixam repelli, vt prima fronte apparet, dolo malo amplissimam, spreto illo omnium malitiarum euerriculo, aperiri fenestram. Sane Germanicam gentem ab antiquissimis temporibus fidei fuisse tenacissimam, ipsi hostes protestantur. Iucundum est, quod TACITVS *L. XIII. Annal. c. 54.* de Verrito & Malorige, qui ista tempestate Frisios regebant, memorat: *Profecti Romam, dum aliis curis intentum Neronem opperiantur, inter ea, quae barbaris ostentantur, intrare Pompeii*

peii theatrum, quo magnitudinem populi viferent. Illic per otium (neque enim ludicris ignari oblectabantur) dum confessum caueae, discrimina ordinum, quis eques, ubi Senatus, percunctantur, aduertere quosdam cultu externo in sedibus senatorum, & quinam forent, rogitantes, postquam audierant earum gentium legatis id honoris datum, quae virtute & amicitia Romana praecellerent; NVLLOS MORTALIVM ARMIS AVT FIDE ANTE GERMANOS ESSE, exclamant, digredunturque & inter patres confidunt, quod comiter a visentibus exceptum, quasi impetus antiqui & bona aemulatione. Et ne quis haec ad gentium Germanicarum, aut qui eas regabant principum constantiam pertinere, aliud de priuatis, de singulis forte dicendum esse temere existimet, IDEM ille optimus de Moribus Germanorum testis c. 24. Aleam (quod mirere) sobrii inter seria exercent, tanta lucrandi perdendique temeritate, ut cum omnia defecerunt, extremo ac nouissimo iactu de libertate & de corpore contendant. Vitus voluntariam seruitutem adit. Quamuis iunior, quamuis robustior, alligari se ac venire patitur, ea est in re praua peruicacia. IPSI FIDEM VOCANT. Qualem fuisse credis
maio-

maiorum nostrorum in seruandis promissis fidem, quorum in re minus laudanda tanta memoratur animi constantia. Nec defecere serinepotes. Ita SPECVLATOR SAXO L. I. art. 7. editionis antiquissimae Lipsiae 1488 fol. impressae & ab Ill. DECANO ex ditissimo penu mecum communicatae. *We so vor borget eder lauet de schal dat gelden, und wat he deit, dat scal hy stede holden. Si quis aliquid commodauerit & stipulatus fuerit, hoc reddere debet, ET IMPLERE QVICQVID FECERIT.* Adde si lubet, B. HERTIVM ad celebratissimam paroemiam: *Ein Wort ein Wort ein Mann ein Mann* de Paroemiis Iuris L. I. Paroem. 8. Verum enim vero & haec verissima sunt, & nihilominus iis, quae de huius actionis non vsu dixi, sua constat veritas. Tantum abest, vt maiores nostri sinuosam illam praetoriae in integrum restitutionis ex capite doli mali semitam vnquam fuerint ingressi, vt potius a legitimo Iuris naturalis & rectae rationis tramite nunquam vel latum vnguem deflexerint, & negotium omne, dolo malo, vel causam dante, vel incidente, gestum ab origine gentis nostrae fuerit, & sit apud nos, qui nunc sumus, &, vt bene de posteris nostris speramus, porro futurum sit ipso iure nullum. Sed meretur hoc caput, vt diligentius paulo
Ro-

Romana instituta cum moribus nostris conferamus.

II. NORVNT GERMANI DISTINCTIONEM IN DOLVM BONVM ET MALVM.

Iui autem in superiori capite per distinctiones, quae via in hoc loco iterum tenenda est. Prima erat Iuris Romani distinctio in dolum bonum & malum, quae cum in ipsa rerum humanarum natura sit fundata, non potest non, nobis Germanis quoque esse cognitissima. Etiam maiores nostri norant uti dolis aduersus hosfes, & ad fortissimorum virorum, qui Varum cum tribus legionibus trucidarunt, laudes refero, quod VELLEIVS PATERCVLVVS L. II. c. 118. memorat: *At illi, quod, nisi expertus, vix crederet, in summa feritate versutissimi, natumque mendacio genus, simulantes fides litium series, & nunc prouocantes alter alterum iniuria, nunc agentes gratias, quod eas Romana iustitia finiret, feritasque sua nouitate incognitae disciplinae mitesceret, & solita armis discerni iure terminarentur, in summam socordiam perduxere Quinctilium; usque eo ut se praetorem urbanum in foro ius dicere, non in mediis Germaniae finibus exercitui praesse crederet.* Nec in priuatis cau-
sis

sis res se aliter habet, nemoque facile dicet, mentiri mentis compotem, qui furioso persuadet, gladium, quem sibi dari postulat, apud se non esse, qui homini irato hostem quaerenti negat, in sua domo latere, vt ille subducatur occisuro, nec facinus committatur; aut fidem fallere eum, qui solerter rem suam gerit, non nocendi, sed cauendi animo. Dolos malos autem & technas turpis lucri aut quaestus causas compositas merito omnes, quibus vena est vlla paterni sanguinis, hodieque auerfantur.

III. IGNORANT DISTINCTIONEM IN PACTA ET CONTRACTVS.

Non ita comparatum est cum altera distinctione in Pacta & Contractus, cum & hic a Iuris naturae & gentium simplicitate nunquam recesserimus. Nullius momenti visa est nostris maioribus exceptio: *non satis deliberavi*, secundum illam veterem paroemiam:

*Vor gethan und nach bedacht
Hat manchen in groß Leid gebracht.*

Vide si lubet *der Teutschen Weisheit, das ist, auferlesene Spruche und Spruchwoerter durch M. Fridericum Petri P. II. lit V.* Nec adeo vilo remedio iuris ciuilis vnquam habuerunt opus,
E quo

quo obligationem naturalem in foro suo fulcirent, & ut inter contrahentes nasceretur actio ciuilis, efficerent. *Hodie*, inquit B. STRYCKIUS in Vsu Moderno tit. Dig. de Pactis §. 1. *pactorum vis non est imminuta sed aucta potius, dum moribus praecipue facultas producendi actionem pactis quaesita, adeo, ut quamuis Iure Romano notorium sit, ex pacto nudo non dari actionem, hodie vnamine doctorum sit conclusum ex omni pacto serio & deliberato inito, hodie validam nasci actionem, & in Tit. Dig. de Reb. credit. §. 3. Vnde non existimo apud Germanos discrimen fuisse inter contractus reales & consensuales, sed omnia ipsorum negocia fide semel data nitebantur.* Adde B. THOMASIVM in Notis ad istum vtrumque titulum.

IV. IGNORANT DISTINCTIONEM INTER PRAETOREM ET IUDICEM PEDANEVM.

Contraxere vel pacti sunt duo e nostris hominibus, alter alteri sponte satisfacere non vult, eundum est ad iudicem, qui reluctantem cogat. Ad qualem vero? ad Praetorem? sed ille non est; ad Cancellariam, ad Regimen forte, aut quo demum nomine venit ille Confessus, a quo ad Principem est appellatio? ut edentem actorem,

rem, excipientem reum audiat, causam constituat, Iudicem aliquem Pedaneum, vel Praefectum, vel municipalem magistratum, vel commissarium, det, qui cognoscat, sententiam ferat, sibi seruato mixto imperio. Insani esset hoc statuere. Iudex nempe omnium infimus, cui reus paret, ab actore est adeundus; si hoc non fiat, & reus de adempta prima instantia conquerratur, iudex superior causam, ne quidem inspectam, eo remittit: ille de causae natura, & num futura sit de iure & aequitate, an de facto disceptatio, prorsus securus, partes citat, actorem edere, reum litem contestari iubet, amplissime cognoscit, abscisse iudicat, & , nisi forte prouocatione res ad superius tribunal deuoluatur, sententiam exsequitur, causam finit. Ex quo patet, Praetoris & Iudicis Pedanei officium & quoad nomen & quoad ipsam rem, a foro nostro abesse, & semper abfuisse.

V. IGNORANT DISTINCTIONEM IN FORMULAM IUDICANDI EX BONA FIDE ET STRICTO IVRE, ADEOQVE ETIAM IN CONTRACTVS BONAE FIDEI ET STRICTI IVRIS.

Si Iudex abest Pedaneus, formula gemina bonae fidei & stricti Iuris, absit necesse est. Si for-

mula abest, distinctio abest, huic formulae innixa, Contractuum in bonae fidei & stricti iuris & non magis absonum est dicere absque illa iudicandi formula, vel saltem eius vi & potestate non existente, apud nos tamen reperiri istas duas contractuum species, quam asserere stultum esset, fuisse apud Romanos pacta bonae fidei & stricti iuris. *Merum commentum Quiritium*, sunt verba B. GVNDLINGII in alleg. Diss. de Vsu pratico Actionum bonae fidei & stricti iuris cap. II. §. 5. *sapit tota, de qua disputamus differentia. Quid enim impedit, quo minus magistratus undique sectetur aequum, & suppleat, quae sunt omissa a contrahentibus, detrahatur, quae sunt praeter ius & morem admissa?* Sed & nobilissima contractuum stricti Iuris exempla fere apud nos deficiunt. Stipulationes in Germania nostra, fatentibus omnibus, semper sunt ignoratae. Nomina, qualia nequam Pythius fecit quid fuerint, vix inter peritiores constat, tantum abest, ut nostri argentarii vel fando aliquid de iis acceperint. Adeat, qui haec curatius nosse volet, GVNDLINGIANA P. IV. c. 2. quod est, *de obligatione nominibus facta, item literarum*. Mutuum, uti Quiritibus ex ratione prorsus peculiari stricti iuris esse placuit, ut acute obseruat laudatissimus GVNDLINGIVS
d.

d. Diff. c. II. §. 6. plebis nempe in diuites, vsuris capiundis deditos, ferale odium, quae interea erat inops & plurium rerum fungibilium erat indigens, nec semper soluendo, eoque haud raro moram trahens, donec dissolueret contracta nomina; ita istum contractum in Germania non eodem iure debere conseri, prouida Imperatoris & Imperii cura in *Recessu Imperii de A. 1600. §. So viel nun 152. &*, quoad terras Luneburgicas diuae memoriae Dux CHRISTIANVS in *der Furstl. Braunschweig - Luneburg - Cellischen Policey-Ordnung c. XXXIX §. 6.* dudum constituit, in quibus legibus, qui exceptionem a regula, a nostra iurisprudencia abhorrente quaerunt, oppido falluntur.

**VI. IGNORANT ITAQVE ACTIONEM DE DOLO
MALO IURIS ROMANI, NEVTIQVAM E-
MENDATIONEM PRIVATAM PVBLI-
CAMVE.**

Eadem itaque vis est, idem effectus doli mali, in omnibus negociis, conuentionibus, pactis, contractibus, semper validitati συναλλαγμάτων obligationique paciscentium obstat, nihil est, quod stringat, vbi mala mens & laedendi alterum cupiditas sese exserit, nihil tunc est, quod valeat, quod teneat, & ad quod rescindendum destru-

E 3

endumque

endumque, vlllo Praetoris auxilio, vlla restitutione in integrum, vlla formula ad id efficaci, vlllo infamiae metu, opus sit. Fingamus adesse Canium hominem apertum, indignis modis deceptum esse a Pythio nostrate, quamvis melius sperem de nostra aetate, quam vt hominem apud omnes gratiosum & locupletissimum ad tam pudendam nequitiam delabi posse putem. Fingamus tamen, sanctissimis verbis Canium promississe, accuratissima formula se obligasse; semper re comperta in omnis generis negotio supererit doli tam mali exceptio, & causa cognita Canium absoluet iudex. Fingas Canium soluisse, & idem quacunque iudicis imploratione, vel, quanto pluris emit, si rem tamen habere malit, consequetur, vel reddita re, id quod soluit, quod vicissim dedit, recuperabit, immo si hoc apud tertium fuerit, vt suum, libere vindicabit. Tali actione, quam vel conditionem certi ex mutuo, vel emti, vel venditi, vel permutatoriam, vel aestimatoriam vel alio quocunque ex contractu oriundo nomine, vel denique, si lubet, actionem in factum nominabis, conuentus, si dolum commissum sponte non emendat, iudex, vti aequius melius, nunquam non condemnabit, & moras ne sententem, renitentemue, praeceptis poenalibus, manu militari, carcere, coget, spreto arbitrarie qua-

qualitatis, foro nostro incognitae, auxilio. Eadem per triginta annos, & lite semel contestata per quadraginta annos viuet. *l. ult. C. de Praescriptione 30 annorum.* Eadem aduersus parentes, ni pietas aliud suadeat, aduersus dignitate excellentes personas, si fuerint tam sui gradus immemores, aduersus heredes denique, cum sit rei persecutoria, dabitur. Atqui, inquires, famae tamen periculum abest, & inde male consultum rei publicae. Minime vero. Primum notes velim, vitam & famam apud Germanos pari passu ambulare, adeoque durissimum esse, ob quemcunque etiam leuem dolum aliquem posse de fama periclitari. Deinde res nobis aliquando est cum Pythiis, profligati pudoris hominibus, qui famae dudum perditae iacturam pro poena sibi dictari rident. Denique Iudex egregius post satisfactionem priuatam ejusmodi nebulonem vel verbis grauissimis, vel ipsa re castigabit: aut si res suo arbitrio maior videbitur, referet ad Principem, qui vel carcere, vel multa, vel publica ignominia, vel alio quocunque priuilegio odioso, pro diuersitate nequitiae, morum nostrorum simplicitati cauebit.

VII. EVERRICVLI AQVILIANI VSVS HODIERNVS.

Quid itaque cum isto malitiarum euericulo est faciendum? Dicam subridens verum. Euericulum

riculum, vt hoc praemittam, NONIO teste, *est genus retis piscatorii, a verrendo dictum, vel quod trahatur, vel quod, si quid fuerit piscium nactum, euerrat.* Illa negociorum humanorum ciuiliumque contractuum copia Oceani instar erat, in quem Romae gemino flumine quotidie nouae conuentionum figurae exonerabantur. Alter amnis erat bonae fidei, limpidus plerumque & purus, aut si quid doli erat admixtum, ea erat Oceani natura, vt quicquid esset in negociis duri, statim & sponte solueretur. Alter riuus erat stricti iuris, quo saepe numero plura illiquida, atque impura bituminis veluti frustra non ferebantur modo, verum etiam isti Oceano inferrebantur, nulla illius virtute soluenda, adeoque eius puritatem limpiditatemque multum turbantia, donec Aquilius suo iudices, iurisque consultos exornaret euerriculo. Est nobis quoque eiusmodi pelagus, sed in quod omnes conuentionum species vno feruntur **aluo**, quem bonae fidei appello. Est nostri maris forensis ea natura, vt quicquid dolosi durique infertur, vno statim momento dissoluatur. Ad hoc mare olim accessere ex Italia reduces pisca- tores, & euerriculis Aquilianis, illud verrere, conuer- re, reuerrere coeperunt, sed vti nunc videmus oleum operamque perdiderunt. Solent ii, quibus multum est laboris & operarum, suppellectilis & instrumenti necessarii ingentia condere horrea, in quibus etiam nonnulla conspiciuntur rerum antiquarum, aut ab vsu remotarum, sed sua elegantia artificioque sese commendantium repositoria. Ita & Icti sua habent rerum quotidianarum horrea, sed & nonnulla, maxime suppellectilis Latialis armaria. In tali euerriculum illud nostro foro minus idoneum, sed pulcrum sua natura, & institutis Romanis ap- tissimum legumque illarum Tyronibus, vt noscant, iden- tidem inspiciendum, confecto, vt reor, negotio, laetus suspendo.

F I N I S.

